

Fedoroacha

letoi coroataja

Acaauru coaucane biha Fedoro

1 ¹Canuna Jesocurisito letononeein- rai afosotolo Simoon Fedoroneeun. Cana Coaunera, chaen nii cana ichoteraneein nena Jesocurisito, naaonjoainuri chabana nohanelanaala cana rai caohacha jataain nelatei teraneein neeuruhane esenetaeranequiche canacaanu rijijieeine raine caa quiricha laenaan. ²Nii Cana Coaunera aina Cana Curuaanaa Jesocurisito coitucuhichene jaan aina cuaain, itolere inaraacha latei que inara rausiaemiin Cana Coaunera, jeelai amuritoheriin raotojoeein neeichene coina.

Jesocurisito ranojoi ichao

³Cana Coaunerate itolere niicha ichana nainei ichaain, cana ichao rai canaacha latei teein, leinjiin cana suujua coaraain nihacachene jaanu teein ne. Nitohaneente nii niicha ichana nainei ichaain, cana cotiharaaneein nena coitucuerate cana que Cana Coaunera. ⁴Satiin nii cana rai niicha tei aina cuaainte, cana rai tihane coina naitoonjoa jataain itolere amurijiriin itolere que nelatein nena te Cana Coaunera. Nii aina cuaain niicha tei ichaonaa que ichaohin, nii itolere bana baaso coacuhin nitajera niha cachane jaan jianein ichaohichene coina.

⁵Aihana jaun, jereniha inara suujuane nihanatiin, atiin jeelai amuritoheriin jeriha Cana Coaunera rijijieein esenetaain cha coitucuheraaneein neeichene coarateein, ⁶inaraacha coitucui aina cuaain caohatiin coacuhin, baasoneein coaauquiche inara suujua cuhanene tonoraelanaala, nererojoeacelanaala neein, ⁷inara belaiha Cana Coaunera rijijieein jiniiquiin ita belaiin ichaaoche.

⁸Nitohanai ichaain ichaohichene, coatiha inacojoeein nelatelanaala nerinaain inara ichao. Niheichu inacojoeein Cana Curuaanaa Jesocurisito coitucuriheeicheein. ⁹Nete laen, nitohanai ichaelanaala nena, leinjiin maosa rijijieein cha coaraelanaala nihane jaun, jauriaalu rai nosa caje couluonohiniane baiteein nihane jaun aicheein. ¹⁰Canejeraauru, nitohaniane jaun, inae inara janijiin inara raain nihalu Cana Coaunera jaun, esenetaaichene ilaauche inara suujua cuhane. Nitohanein neeichene coatiha chabana esenetaaichene jianeriheeicheein. ¹¹Chaen techu nitohanein neeichene, cana Curuaanaa Jesocurisito Cojoanona chabana satonoelanaala nena bacuujuja neyoracaane jana ranojoeinein neriquicheein.

¹²Nii jaunne, inae caohachaain inara relaauruhane jaan coitucuhin jeriha Cana Coaunerane rijijieein ichaohichene nihanatiin, itolere bana inara rai coaureeunni nabana baitequichene coataa. ¹³Jaiti ichaaojihanune jaunte ne carai rauhi inara suujuateein nihanune coina. ¹⁴Cana Curuaanaa Jesocurisitote, inae enanocoojoa orichaaunine coitucuerate canu que. ¹⁵Nena atiin nainichaaunne jaauin tiaajeein inara corootajanereeeunni, inae ohanune baiha satiin canuhacha ichai coacuhin neeichene coina.

Itolere amurijiriin niicha ichana nainei ichaa Jesocurisitone

¹⁶Nii niicha ichana nainei ichaain, turuhalu Cana Curuaanaa Jesocurisitone que inara relaacaanune jaan, coatihau raujiaain nereretanaa neein nena nihei. Niheichu coatihau canacaanu suujua caje rocohin cojoeluinnaan nohanihau aitohacaanu. Canacaanu nota que itolere ichaa Cana Curuaanaa Jesocurisitone jana coaracaanune jaan quena aitocooanu. ¹⁷Coarajihacaanune jana techu, rai necaohacha teein jataain erena raotono que ereein rai Calaohi nihane cocoinaa: “Caate jataain canuhacha belaaoneein, janijiiin canuhacha tei cacalabine,” naain rai nii Calaohi cocoinaelu Cana Coaunera. ¹⁸Nitohaneeine que banijiaain nena ichtatane ucuunno neein, Cana Curuaanaa aina jiniiquiiin neein, dedeeu neein rai iriha Cana Coaunerane jana aonacaunlu.

¹⁹Niite, esinae rauhijiriin berejetocuruha *profetacurune* coitucuhin esenetaain neeichene jaanu neein nena ne. Aihana jaun, caa canacaanuhacha beebejeite, leinjiin nocohanaanau jeraaen conohajein conoha conone rijijieein inara conoera neein, janonaa

rai mituhin conoha soaaene rijijieein, inara suujua cuhane conaeraneein nereein, turuha rai cojoanonaane que tiaain. ²⁰Aihana jaun, esinae rauhijiriin berejetocuruha *profetacurune* esenetaaichenete ne. Nii jaun, satiin Cana Coaunera Quiricha cuhane laenanohineein nena, coatihau suujua caje rocohin aitocuruha *profetacurune* jaan nihei. ²¹Aihana jaun, satiin *profetacurune* coatihau rai suujua caje rocohin aitoroaetocuruhi, Cana Coaunera Suujue acaauru que coitucueratihane jaunte, acaauru que coitucueratihane rijijieein berejetocurelu.

Nechu joaenreen nohaneein cacha relaauruhane.

2 ¹Isaraelitaauru jana nihalu nohaneein cacha relaaurera *profetacurune* rijijieeinte, inara jana netonai neeureein cacha coritaain cacha relaaureraauru. Acaaurute jerichanejein inara relaa nocoetiin, inara que asinojoneein nechu nohaneein inara relaaurureein suujua baaso caje rocohin. Nitohaneinte inara ichoteraneein niha Jesocurisitone saijieein, acaacha esenetaaichene caohateraneein neeureein. Nitohaneeruhane jaunte itajenojohi necureein. ²Arajiichurute nechu nichao aasaeraanu que acaauru ichao baaso rijijieein ichaaurureein. Nii coaraante chabana satonohelanaala nena ichaonaanaja coero cuhane cana amaeranein niha Jesocurisitone saijieein que baasoneein ereureein cachaauru. ³Nitohaneeruhane jaunte, coriquiicha que coaauruhane jaun inara cairichaurureein, inara coritaain inara relaauruhane coreniha. Nete inae inoanlu caje coauneein casetecanohineein neeruhane coina, inae ichanohineein nihane jaun caseteco

coaracuruhane rai neeure. Nerihaain nii caje acaauru ichotera.

⁴Cana Coaunera, osa que nesaruhin neeuruha rai letonocuru aanjeraaurune jana, acaauru que suujua acatelanaala, usi tabai aina nocohena tabai jana *cadena* que ichohanohineein jaonajaelu, satiin coulurujuenojoi niha cachaaaurune cojoanona que turuhane reentiaain cuu neeuruhane coina. ⁵Nii rijjijeein techu satiin coitucuelanaala nenacaauru cachaaauru que suujua acatenelu Cana Coaunera, inoaenlu acau tabai que chauratane jooratihane bana. Acaihaniji Nohechate esinae rauhijiriin aca jerihane rijjijeein ichaohin nihane coaratihane jaun ichoterateein, chaen aina caainsineein nenacaauru cachaaauru ichoteratelu. ⁶Jerichanejeein techu, Sodoma, Gomora, naajoaihunri neseeuuru cocoaichacuru mocoeratelu ajaneneein nitajeeuruhane que tiaaajoaain Cana Coaunera. Nitohaneinte ichaelu Cana Coaunera, nii baiha neenihuru baaso ichajeein ichaonacaauru cachaaauru notaaca niqui, nii caje nainain baaso ichaelanaala ichaauruhane coina. ⁷Nete laen Loto ichoteratelu, aca caohachaain ichaohin, nii baaso ichacuruha necha aansainein ichaonacaauru cachaaaurune rautaain coaraenihane jaun. ⁸Nitohanein jetaote, cojoanonetojeein baaso ichaain neeuruhane coaraain, baasoneinchuru ita rai ereeuruhane aonaane jaun, que suujua rohecaeriin niha Lotone jana ichoteratelu Cana Coaunera.

⁹Nitohaneinte esenetaain rai cachanein nenacaauru ichoterate cairichanojooinein neeuruhane caje Cana Coaunera. Nii rijjijeein techu, caseteconein neenihuru casetecae, rai cojoanona que turuhanereein tiaain caseteco neeuruhane coina. ¹⁰Nitoha-

neeinte letoaa suujuane rijjijeein baasohacha ichajeein, Cana Curuaanaa Jesocurisito batojoeriin nenacaauru casetecareein Cana Coaunera. Chaen techu erena tonoraelanaala enaacha joaenreein cha chaain, chaque casilanaala acaauru amurijiriin nenacaauru necoeje chanuhin naajoaauru. ¹¹Nete laen anjeraauru acaauru amuritoheriin cocoinanohineein neeuruha natiin, acaauru amurijiriin Cana Coauneraacha cocoinanohineein nenacaauru nocoeje chanunaa nainecurene.

¹²Nii suujua letono rijjijeein baaso ichajeein ichaonacaauru cachaaauru, nechu aiha leinjiin ataebinaene rijjijeein cha coitucuelanaala ichaauruhane jaun, cha coacuelanaala joaereein niicha ichai ichacure. Chaen techu sohin jaonojooinein itajenojooinein neeuruhane coina inae ichanohineein neeure. Chaen techu niicha coitucuhi que nihanatiin enaacha baasonein ereeure. Nete ooruha ataebinaecurune rijjijeein ohin, ¹³acaauru netonai leeochoauru cairichaaain neeuruhane coreniha cairichei coaracurureein. Raotojooein niha nocoetiin niqui rachoojoenaa nitaje rai nena que rachoojoeure. Chaen techu jataain coejenacai aina osa que inara saruha inara aina rachoojoeure nechu inara coritaa beseta ichaain neeichene.

¹⁴Chaen techu ene coaracuruhane itolere bana jereein coaracure. Nii jaunte chabana osa que nesarucuruhane coejein jianena nainecurene. Chaen techu enaacha osa que leeochoauru saruhin, itolere niicha latei jereein, queecha coacuhin nechu aansainein ichaao. ¹⁵Nitohanein neeuruhane jaunte, inae nitajenaanein neeure; Cana Coaunera bero rijjijeein rene cana turuaeranein niha Jesocurisitone

saijjein, sacuelanaala jianein neeuruhane jaun. Nii jaunte aihalu Beor calaohi *profeta* Balaamne rijijjein neeure. Aca jetaote coriqui jeriha baaso ichana jerihane jana jetao, ¹⁶rai suujua coarihei amunein baaso ichaa cuhane coataa jetao, cache rijitiin rai ereein, baaso ichaane caohate nii amaera cabario rijijjein nena asno.

¹⁷Nitohaneei cache relaeranein nenacaaurute, caohacha que cache relaelanaala, nechu cache ichao asaeranein nena que cache relaaure. Nii jaunte chabana satonoelanaala nena nocohenaanau caseteconein neeureein. ¹⁸Itolere quete niqui ereeure. Nete jataain joanreein aitocure. Nitohaneinte, acauru ichao rijijjein ichaoruhane jianein, ena Cana Coanera coitucunaa nunuhetejeeurerauru- cachaauru saruure osa que. ¹⁹Itolerenein niicha ichana jerei ichaa cachane jereinte niqui ereeure. Nete acauru itajeranu letononein netiin aitocure, satiin cache, rai suujua saruhera tonoraain nena rai letononein nihane jaun. ²⁰Nitohanihane jaunte inae Cana Coanera coitucuhin, cana ichoteranein nena Jesocurisitone maajein coitucuhin nihane jaun, inae Cana Coanera coitucuelanaala nenacauru ichao rijijjein ichaohane caje nichotein nihane saiijjein, nacoaunein nii jauriaalu aihalune rijijjein ichaohin niha cachane, jauriaa aihalune amuritoheriin baasonein ichoae. ²¹Nitohanihane coataate niqui nirijjein, cana ichoteranein niha Jesocurisitone coitucuelanaala neeuruhane caohachae. Nabana acauru rai tenojoineein niha nii cana rai beratenojoi Cana Coanera caje nenaane saiijjein que jaolecooruhane coataa. ²²Nete inae nitohaneururichaaaine que: “Narohane baihate

jeelai naro qui remaae. Caohatiin culeenojoinihane saiijjeinte inae nacoaunein naticho cuhane cue coosi,” naa acauru que erenaane rijijjein neeure.

Nacoauneei tururichaaain Jesocurisitone

3 ¹Caa quete, inae coroata sae quiricha laenaain letoaanu jataain canuhacha belaaeinein neiniquichene rainera canejeraauru. Nii coroatajai canuhacha laenai quiricha cuhanena inara suujuateun, caohachaaain inara suujua coaraain, baaso coacuelanaala rauhijiriin coacuhin neeichene jerichaaunne jaun. ²Inoanlu inara rai berejetocuruha Cana Coanera tenojoineein nenacauru *profetacurune* coacuhin, inara relaeratein nihalu rai afosotooro que cana ichoteranein nena Jesocurisitone coacuhin neeuche.

³⁻⁴Inae caa baihate nechu inara necoeje chanuha: “Aanca Jesocurisito. Nacoaunein turuhane coinete niqui aitelu. Inae ohacoaauruha cana foerate racuru niqui, nete jerichanejeein sacue necoaanaa cana rai chauratanene caje coaaunein nihane rijijjein,” naain ereeururichain nechu jeriha acauru suujuane rijijjein baaso ichajeein ichaonacauru cachaaurune que nainaan ichaaoche. ⁵Nitohaniha acauru ichaone jaunte, jaiti necoaana-niha satiin itolerene ajiniha, inae nesiha dedene jana, acau nejesinanein niha caa chauratanene jana, nitohanein jeriha Cana Coanera jaun, acau caje coaanohineein nihalu caa cana rai chauratanene coitucuhin esenetana jerecurene. ⁶Nii rijijjein techu, elo tabai aina cuaain itajenojoineein nelu caa cana rai chauratane. ⁷Nete laen, caa ena nena dede, chauratane, naonjoainuri, inae nitohanein jeriha Cana Coanera jaun, usi tabai que

nitajeeuruhane coina rucuhenehinee
neeure. Nii usi tabai, baaso icharaauru
itajeranuneein nenaate, acaauru
mocoreein cana janonaa satono bana.

⁸Canejeraauru, jiaonriha Cana
Coaunera rai le jiichoo, le oaraanca
jaanacanei carajanihane jana, le
oaraanca jaanacanei le jiichoonejihane
baitichache. ⁹Coatiha niqui aitocuruha
esenetaaichuru tabaaaurune rijijieein,
cana rai naitoonjoan tihane baitihane
jaun, caeneenejihei Cana Coaunera.
Chuni nitajihane jerenihane jaunte,
saain nichoteein niha cachane jerihane
jaun, jaiti inara cojoae Cana Coaunera.

¹⁰Nete inae ecu tihane bana, coitucue-
raelanaala turuha asijiautone rijijieein,
coitucueraelanaala turoreein cana
Curuaanaa Jesocurisito. Nii janate
tonijiaain coasinacaain neranuha
cureein caa canaacha coarajei dede.
Itolere, que nenacaauru netonaite
itajereein usi. Jana chauratanete satiin
que nenacaauru aina jiniiquiin coaraain
benojoinereein Cana Coaunera rai.

¹¹Nitohaneein nitajerichaaain itolerene
jaun, leeocho que coacuelanaala, jeriha
Cana Coaunerane rijijieein ichaaоче.

¹²Aihana jaun, chajaain jeriha Cana
Coaunerane rijijieein neeuchete carajae-
lanaala turuhine. Inae turuhane banate,
usi tabai que itajenojoiniha cureein caa
dede canaacha coarajei. Itolereite nii usi
jana neein mocoreein. ¹³Nete
nitohanihane nihanatiin, cana laen ena
nena dede, ena nena chauratane,
naonjoaihunri cana rai tihane coina
Cana Coaunera aitoonjoa cohajerichaa-
cheein. Ecu coatiha inae nerinaain
baaso, caohacha nejesinaachate nereein.

¹⁴Canejeraauru, aihana jaun, nii que
turuhaneein cohajeein, caohachaaain
ichaaochete osa colane raotojoein cha
ujuaihonelanaala neeichene jana, inara
eruhine Cana Coaunera. ¹⁵Aihana jaun,
satiin nichoteneaa coina, cana cohaca
jaiti turueniha cana Curuaanaane
coitucuhin que nainaan neeuche. Nii
quete inara rai niicha laenai quiricha
cuhane beein laenaeraete cana nejera
Faboro, que coitucueratiha Cana
Coaunerane caje coitucuhin. ¹⁶Le
quirichaauru niicha laenai nainetiinte,
nii que aitiin beein laenaeraete cana
nejera Faboro. Nete tabaauru coitucuna-
caene caaintatiin aitohane jaun. Nii
jaunte, leeochoaauru Quiricha
laenanohineein nena ichacuruhane
rijijieein, acaauru jerecuruhane rijijieein
rotohi que cacha relaaure, tabaauru
caohachaaain suujua coaraelanaala
nenacaauru cachaauru. Nii corenihate,
caseteco coaracurureein inae ecu tihane
bana.

¹⁷Canejeraauru, nitohanihane jaun,
inae nii ajiniha caje coauneein nii
coitucuhin neeichene jaun, inara
coritaaauruha nechu aansai cachaau-
rune esenetaaichene coataa que
nainaan ichaaоче. Nabana inara
coritaaauruhane esenetaain inara
suujua coreein acaauru rijijieein
neeichene coataa. ¹⁸Nete jeelai
amuritoheriin cana ichoteraneein
nena Cana Curuaanaa Jesocurisito
coitucuhin, jiniiquiin aca jerihane
rijijieein ita belaiin neeichene
caohachae. Aca acaneein nihane
coitucuhin coroaecuruhine chabana
satonoelanaala. Nitohaneein neeine.